

Ao, Khud Dekh Lo 27

Mat Ghabrāo

Abadī Manzil kī Rāh



mat ghabrāo. abadī manzil kī rāh

Do Not Be Troubled. The Way to Your Eternal
Home

by Bakhtullah

[*Ao, Khud Dekh Lo 27*]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is derived from ljc
<https://pixabay.com/illustrations/heaven-stairs-to-heaven-sky-faith-2138568/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Tumhārā Abadī Ghar Hai	1
Main Abadī Ghar kī Rāh Hūn	4
Merā Bāp Tumhārā Bāp Bhī Hai	5
Tum Bare Kām Karoge	7
Injīl, Yūhannā 14:1-14	10

Fasah kī id thī. Īsā Masīh shāgirdoñ ko is ke lie taiyār karne lagā ki thoṛī der bād main tumhārī k̄hātir apnī jān dūngā. Shāgird us waqt pūrī bāt na samajh sake, lekin wuh be-chain hone lage. Thoṛī der pahle yoñ lag rahā thā ki ustād Isrāīl kā wuh bādshāh banegā jis ke lie sab tarap rahe the. Ab is ke ulaṭ ho rahā thā. Yih sawāl bhī uṭhne lagā ki hamārā kyā banegā?

Is dukhī māhaul meñ zarūrī thā ki shāgirdoñ kī hauslā-afzāī kī jāe. Un kā āqā jāntā thā ki is waqt wuh sab kuchh samajh nahīn pāenge. Lekin bād meñ yih bāteñ unheñ sahī paṭarī par lāengī. Pahlī bāt,

Mat Ghabrāo: Tumhārā Abadī Ghar Hai

Us ne farmāyā,

Tumhārā dil na ghabrāe. Tum Allāh par īmān rakhte ho, mujh par bhī īmān rakho. Mere Bāp ke ghar meñ be-shumār makān haiñ. Agar aisā na hotā to kyā main tum ko batātā ki main tumhāre lie jagah taiyār karne ke lie wahāñ jā rahā hūñ? Aur agar main jākar tumhāre lie jagah taiyār karūñ to wāpas ākar tum ko apne sāth le jāūngā tāki jahāñ main hūñ wahāñ tum bhī ho. Aur jahāñ main jā rahā hūñ uskī rāh tum jānte ho. (Yūhannā 14:1-4)

► *Shāgird kis par īmān rakhte haiñ?*

Ḳhudā par.

► *Agar wuh Ḳhudā par īmān rakhte haiñ to un ko kis par īmān rakhnā chāhie?*

Un ko Īsā Masīh par bhī īmān rakhnā chāhie.

► *Kyon?*

Kyonki wuh Ḳhudā Bāp kā Farzand hai jo us ke pās jākar un ke lie jagah taiyār karegā.

► *Ḳhudā ke ghar meñ kyā hai?*

Ḳhudā ke ghar ke bahut-se makān haiñ.

- *Hamāre lie yih kyonḱ ḱhushḱhabrī hai?*

Yih ḱhushḱhabrī islie hai ki Ḳhudā ke ghar wāloñ ke lie makān taiyār haiñ. Ghabrāne kī zarūrat nahīñ hai, kyonki us ke pās hamārā abadī ghar taiyār hai.

- *Lekin ham kis tarah us ke ghar wāle ban sakte haiñ?*

Īsā Masīh par īmān rakhne se. Usī ne apne logoñ ke lie jagah taiyār kar lī hai.

- *Wuh kyonḱ apne logoñ ke lie jagah taiyār karne jā rahā thā?*

Tāki jahāñ wuh hai ham bhī hoñ.

- *Lekin ham wahāñ kis tarah pahuñch sakte haiñ?*

Ek ḱhās rāh se. Īsā Masīh ne farmāyā, “Jahāñ maiñ jā rahā hūñ uskī rāh tum jānte ho.”

Tomā shāgird jhaṭ se bol uṭhā, “Ḳhudāwand, hamēñ mālūm nahīñ ki āp kahāñ jā rahe haiñ. To phir ham uskī rāh kis tarah jāneñ?”

Jawāb mein Īsā Masīh ne ek nayā sabaq sikhāyā.
Yih ki

Mat Ghabrāo: Main Abadī Ghar kī Rāh Hūn

Us ne farmāyā,

Rāh aur haq aur zindagī main hūn.
Koī mere wasīle ke baġhair Bāp ke pās
nahīn ā saktā. (Yūhannā 14:6)

► *Rāh kaun hai?*

Rāh Īsā Masīh hai.

► *Is se wuh kyā kahnā chāhtā hai?*

Apnī salībī maut se main na sirf Ḳhudā Bāp ke pās jā rahā hūn. Is se main tumhāre lie Ḳhudā ke ghar tak pahuñchne kī rāh banā rahā hūn. Hān, main hī wuh rāh hūn. Ḳhudā tak pahuñchāne wālī aur koī rāh nahīn hai.

► *Īsā Masīh rāh hai. Lekin iskā kyā matlab hai ki wuh haq hai?*

Haq kā matlab sachchāī hai. Is ke pīchhe yih khyāl hai ki jis par pūrā bharosā kiyā jā saktā hai wuh sachchā, wuh haq hai. Jo chīz jhūṭhā

hai us par bharosā nahīn kiyā jā saktā. Lekin Īsā Masīh par pūrā bharosā kiyā jā saktā hai. Us meñ unnīs-bīs kā farq bhī nahīn hai.

► *Īsā Masīh rāh aur haq hai. To iskā kyā matlab hai ki wuh zindagī hai?*

Wuh zindagī kā sarchashmā hai. Wuh maut par ghālib āyā, islie ham bhī us se zindagī hāsīl kar sakte haiñ.

Ghabrāne kī zarūrat nahīn hai, kyonki wuhī Ḳhudā ke ghar pahuñchne kā rāstā hai, usī par ham pūrā bharosā rakh sakte haiñ, aur usī se hameñ abadī zindagī miltī hai. Tīsri bāt,

Mat Ghabrāo: Merā Bāp Tumhārā Bāp Bhī Hai

Īsā Masīh ne farmāyā,

Agar tum ne mujhe jān liyā hai to iskā matlab hai ki tum mere Bāp ko bhī jān loge. Aur ab se aisā hai bhī. Tum use jānte ho aur tum ne us ko dekh liyā hai.
(Yūhannā 14:7)

► *Īsā Masīh ko jān liyā to kis ko jān liyā?*

Use jān liyā to Bāp ko bhī jān liyā.

► *Īsā Masīh ko jān lene se ham Ḳhudā Bāp ko kis tarah jān lete haiñ?*

Īsā Masīh Ḳhudā Bāp kā Farzand hai. Islie jab ham Masīh ko jānte haiñ to Ḳhudā Bāp ko bhī jānte haiñ. Islie Īsā Masīh kah saktā thā ki tum use jānte ho.

Ab Filippus se rahā na gayā. Us ne pūchhā, “Ai Ḳhudāwand, Bāp ko hameñ dikhāeñ. Bas yahī hamāre lie kāfī hai.”

Īsā Masīh ne jawāb diyā,

Filippus, main itnī der se tumhāre sāth hūñ, kyā is ke bāwujūd tū mujhe nahīñ jāntā? Jis ne mujhe dekhā us ne Bāp ko dekhā hai. (Yūhannā 14:9)

► *Jawāb kyā hai?*

Jis ne Īsā Masīh ko dekhā us ne Ḳhudā Bāp ko dekhā hai.

► *Yih kis tarah ho saktā hai?*

Is kī wajah yih hai ki Īsā Masīh Ḳhudā Bāp kā Farzand hai. Islie jo use dekhtā hai wuh Ḳhudā Bāp ko bhī dekhtā hai. Yahī iskā matlab hai jab us ne farmāyā ki main Bāp mein hūn aur Bāp mujh mein hai.

- *Jab ham Ḳhudā Bāp ko jānte aur dekhte haiñ to hamāre lie kyā natījā nikaltā hai?*

Jab ham Īsā Masīh par imān lāte haiñ to uskā Bāp hamārā Bāp bhī ban jātā hai. Īsā Masīh se ham na sirf Ḳhudā ke ghar wāle ban jāte haiñ balki Ḳhudā hamārā Bāp bhī ban jātā hai. Islie ghabrāne kī koī zarūrat nahīn hai. Ek āḳhirirī bāt,

Mat Ghabrāo: Tum Baḳe Kām Karoge

Īsā Masīh ne farmāyā,

Merī bāt kā yaqīn karo ki main Bāp mein hūn aur Bāp mujh mein hai. Yā kam-az-kam un kāmōñ kī binā par yaqīn karo jo mainne kie haiñ.
(Yūhannā 14:11)

► *Shāgirdoñ ko kis kī bāt kā yaqīn karnā chāhie?*

Apne ustād kī bāt kā.

► *Sab se barī wajah kyā thī ki unheñ uskī bāt kā yaqīn karnā chāhie thā?*

Unhoñ ne us ke mojize dekhe, uskā kalām sunā thā.

► *Unheñ us ke kāmōñ se kyoñ yaqīn ānā chāhie thā?*

Islie ki us ke kām ām kām nahīn the. Masīh kā har kām us ke Bāp kī taraf ishārā kartā thā. Jitne yih kām Īsā Masīh ke the utne hī wuh Bāp ke kām bhī the. Kyoñki Ḳhudā Bāp aur Farzand meñ pūrī yagāngat hai.

Lekin Īsā Masīh ne āge ek bāt farmāi jo hairānkun hai:

Maiñ tum ko sach batātā hūñ ki jo mujh par imān rakhe wuh wuhī kuchh karegā jo maiñ kartā hūñ. Na sirf yih balki wuh in se bhī baṛe kām karegā, kyoñki maiñ Bāp ke pās jā rahā hūñ.
(Yūhannā 14:12)

► *Hairānkun bāt kyā hai?*

8 / Tum Baṛe Kām Karoge

Yih ki Īsā Masīh ke shāgird us ke kām karenge.

► *Wuh kyon us ke kām karenge?*

Islie ki jo imān rakhtā hai wuh uskā ghar wālā hai. Aur ghar wālon ke lie yih ek qudratī bāt hai ki wuh milkar wuh kām karen jo un kā sarparast chāhtā hai.

Īmāndār na sirf Īsā Masīh ke se kām karenge balki in se barhkar kām bhī karenge.

► *Yih kis tarah ho saktā hai?*

Īsā Masīh is kī wajah batātā hai: Main Bāp ke pās jā rahā hūn.

► *Bāp ke pās jānā kyon is kī wajah hai?*

Masīh ke jī uṭhne ke bād Rūhul-quds nāzil hogā. Isī Rūh kī madad se Masīh ke shāgird bare kām karenge. Lekin un ke yih kām un kī apnī tāqat se kie nahin jāenge. Yih sāf bayān karne ke lie Masīh ne farmāyā,

Jo kuchh tum mere nām mein māngo
main dūngā tāki Bāp ko Farzand mein
jalāl mil jāe. Jo kuchh tum mere

nām meñ mujh se chāho wuh main
karūngā. (Yūhannā 14:13-14)

► *Yih kām kis ke nām meñ kie jāēnge?*

Yih kām Masīh ke nām meñ māngne se kie jāēnge.

Ġharz, ghabrāne kī koī zarūrat nahīn hai. Hamārā abadī ghar hai, aur hameñ wahāñ pahuñchne kī rāh bhī hāsīl hai yānī Īsā Masīh. Ghabrāne kī koī zarūrat nahīn hai kyonki Masīh kā Bāp hamārā Bāp bhī ban gayā hai. Ghar wāloñ kī haisiyat se ham Masīh ke nām meñ baṛe kām kareñge.

► *Kyā āp bhī Masīh ke nām meñ baṛe kām karne ke lie taiyār haiñ?*

Injil, Yūhannā 14:1-14

“Tumhārā dil na ghabrāe. Tum Allāh par īmān rakhte ho, mujh par bhī īmān rakho. Mere Bāp ke ghar meñ be-shumār makān haiñ. Agar aisā na hotā to kyā main tum ko batātā

ki main tumhare lie jagah taiyar karne ke lie wahān jā rahā hūn? Aur agar main jākar tumhare lie jagah taiyar karūn to wāpas ākar tum ko apne sāth le jāūngā tāki jahān main hūn wahān tum bhī ho. Aur jahān main jā rahā hūn uskī rāh tum jānte ho.”

Tomā bol uṭhā, “Ḳhudāwand, hameñ mālūm nahīn ki āp kahān jā rahe haiñ. To phir ham uskī rāh kis tarah jāneñ?”

Īsā ne jawāb diyā, “Rāh aur haq aur zindagī main hūn. Koī mere wasīle ke baḡhair Bāp ke pās nahīn ā saktā. Agar tum ne mujhe jān liyā hai to iskā matlab hai ki tum mere Bāp ko bhī jān loge. Aur ab se aisā hai bhī. Tum use jānte ho aur tum ne us ko dekh liyā hai.”

Filippus ne kahā, “Ai Ḳhudāwand, Bāp ko hameñ dikhāeñ. Bas yahī hamāre lie kāfī hai.”

Īsā ne jawāb diyā, “Filippus, main itnī der se tumhare sāth hūn, kyā is ke bāwujūd tū mujhe nahīn jāntā? Jis ne mujhe dekhā us ne Bāp ko

dekhā hai. To phir tū kyoṅkar kahtā hai, ‘Bāp ko hameñ dikhāeñ?’ Kyā tū īmān nahīn rakhtā ki maiñ Bāp meñ hūñ aur Bāp mujh meñ hai? Jo bāteñ maiñ tum ko batātā hūñ wuh merī nahīn balki mujh meñ rahne wāle Bāp kī taraf se haiñ. Wuhī apnā kām kar rahā hai. Merī bāt kā yaqīn karo ki maiñ Bāp meñ hūñ aur Bāp mujh meñ hai. Yā kam-az-kam un kāmoñ kī binā par yaqīn karo jo maiñne kie haiñ. Maiñ tum ko sach batātā hūñ ki jo mujh par īmān rakhe wuh wuhī kuchh karegā jo maiñ kartā hūñ. Na sirf yih balki wuh in se bhī baṛe kām karegā, kyoṅki maiñ Bāp ke pās jā rahā hūñ. Aur jo kuchh tum mere nām meñ māṅgo maiñ dūṅgā tāki Bāp ko Farzand meñ jalāl mil jāe. Jo kuchh tum mere nām meñ mujh se chāho wuh maiñ karūṅgā.